

КАНОН СВЯТОЙ РАВНОАПОСТОЛЬНОЙ КНЯГИНЕ ОЛЬГЕ

Память празднуем 11 (24) июля

Тропарь, глас 1-й

Крилами богоразумия вперивши твой ум, возлетела еси превыше видимыя твари, взыскавши Бога и Творца всяческих: и Того обретши, паки рождение Крещением прияла еси: древа животного наслаждающихся, нетленна во веки пребываеши, Ольго приснославная.

КАНОН, глас 5-й

Песнь 1

Ирмос: Величаваго фараона в мори потопивша со оружием и всадники, Израиля же преславно спасша и по суху проведша, поем Христа, яко прославися.

Припев: Святая равноапостольная великая княгине Ольго, моли Бога о нас.

Величие наше и похвала ты еси, Ольго богомудрая: тобою бо идольския лести свободихомся, ныне молися за род и роды, ихже Богу привела еси, поющи Христа: яко прославися.

Святая равноапостольная великая княгине Ольго, моли Бога о нас.

Величаваго диавола из России прогнала еси, нечестивыя кумиры отнюд сокрушивши: вся люди от беззакония свободила еси, мудростию научающи, пети Христа, яко прославися.

Слава: Черность греховную банею Крещения отнюд отмыла еси, Христа возлюбила еси: Емуже предстоящи, молися за рабы твоя, верно славящия тя.

И ныне: Исаия тя Жезл нарицает, Пречистая, Давид же тя Престол Господень, Аввакум приосененную Гору, Купину же Тя Моисей: мы же Тя Матерь Божию нарицаем.

Песнь 3

Ирмос: Державною рукою и сильным словом Небо и землю

сотворил еси, юже Твоею Кровию искупил еси, Церковь Твою, яже о Тебе утверждается зовущи: яко несть свят, разве Тебе, Господи.

Святая равноапостольная великая княгине Ольго, моли Бога о нас.

Державною рукою, и мудрыми словесы, и сильным словом, учила еси твоего сына закону Христову, и людем возбранила еси жрети идолом, Ольго преславная: в память твою ныне сошедшеся, тебе прославляем.

Святая равноапостольная великая княгине Ольго, моли Бога о нас.

Ты яко пчела добру разуму далече цветущия Христовы веры зыскала еси, и яко породный мед Крещение, в царствующем граде обретши, твоему граду и людем даровала еси: егоже вси насыщени, горести греха отбегают.

Слава: Весь похвальный глас, и мольбу ти, Ольго, приносим, тобою бо Бога познахом. Емуже ныне предстоиши, проси мира отечеству, и на поганья победы, и душам нашим оставления грехов, поющим тя, присноблаженная.

И ныне: Приятелище явилася еси, Дево, неприступнаго Бога, тем Тя поют непрестанно Ангельстии Чини, повинующеся Владыце: Ты бо родила еси Слово Отчее, Собезначальное, без отца: о чудо! Святыи Дух осени Тя.

Господи, помилуй (трижды).

Седален, глас 1-й

Крилами богоразумия вперивши твой ум, возлетела еси превыше видимыя твари, зыскаючи Творца всяческих: и Того обретши, паки порождение Крещением прияла еси: и древа животного Креста Христова наслаждшися, нетленна во веки пребываеши, Ольго преблаженная.

Слава, и ныне: Руце Твои Божественнии, имиже Создателя понесла еси, Дево Пресвятая, воплощагося благостынею, простерши умоли Его, избавити нас от искушений, и страстей, и бед, хвалящих Тя любовью и вопиющих: слава Всельшемуся в Тя, слава Прощедшему из Тебе, слава Избавльшему нас Рождеством Твоим.

Песнь 4

Ирмос: Духом Божиим очищся пророк дышающим в нем, Аввакум Божественный, бояся, глаголаше: внигда приблизятся лета, познан будеши, Боже, на спасение человеков.

Святая равноапостольная великая княгине Ольго, моли Бога о нас.

Дух Божий почи на тебе, яко на Девворе пророчице древле: Имже просветившися, укрепляючи Владимира разумнаго, Сисару диавола низложила еси в сети его крещением, яко и Варакон в потоце Киссове прежде.

Святая равноапостольная великая княгине Ольго, моли Бога о нас.

Быстрине подобящися, Ольго Богомудрая, сокрушенным сердцем ста молящися к Богу, избавила еси род твоих людей от оскорбления кумирскаго, и от пленения вражия свободила еси, Христа призываючи на помощь нашу.

Слава: В нарочитый день святого твоего преставления, радостно празднуем, песнь молебную Христу возсылающе, нетленным венцем венчавшему тя, Ольго Богомудрая: проси нам оставления грехов, славящим тя верно.

И ныне: Ты от корене Иессеева процветшую, Исаия якоже прорече, Христа цвет прозябшую, и Первоначальнаго плотию носившую и жезл Божия Духа, хвалим Тя, яко Божию Матерь, и Чистую Деву.

Песнь 5

Ирмос: Слово Божие Всесильное, мир всему миру послѣ и светом истинным освещая и просвещая вся, из нощи Тя славящия.

Святая равноапостольная великая княгине Ольго, моли Бога о нас.

Яко голубица целомудренная, на финикс добродетелей возшла еси, криле священне посребренне имущи: имиже возлетевши в райстей пищи вогнездилася еси, славная Ольго.

Святая равноапостольная великая княгине Ольго, моли Бога о нас.

О тебе пояше Соломон прежде: вне винограда царская маслина процветет. Ты бо святой грозд Крещением в России насадила еси, творящи плод покаяния, о немже Сам Христос

веселітся.

Слава: Умилосердися, Владыко, на новопросвещенныя люди Твоя, не предаждь нас в руки поганых, за множество беззаконий наших: но молитвами наставницы нашея Ольги избави ны от всякия напасти.

И ныне: Кропите вси, якоже пишется, облацы веселия земным: Божий бо Деище Христос, очищаяй мир от грехов, воплотися от Девы, и дан бысть нам.

Песнь 6

Ирмос: В Церковь Небесную Святую Твою да придет молитва моя, вопию Ти, яко Иона, из глубины сердца морскаго: от грех моих возведи мя, молюся Тебе, Господи.

Святая равноапостольная великая княгине Ольго, моли Бога о нас.

Ревность Святаго Духа в сердцах приемши, отеческое зловерие возненавидела еси: и Христа Истиннаго Бога взыскавши, чадо света явилася еси, и с первенцы святых на небесех ликуеши

Святая равноапостольная великая княгине Ольго, моли Бога о нас.

Новая ученица Христова в России явилася еси, обходящи грады и села, кумиры сокрушаючи, и люди учащи Единому Богу поклоняться: Егоже моли за поющия тя.

Слава: О богоблаженная Ольго, помолися за твоя чада к Богу, мир неподвижимый отечеству нашему испроси: и нам отпущение грехов, присно ты прославляющим.

И ныне: Познавше тобою неописанное Слово Божие, Сына Единочадаго Вседержителя, вопием Ти земнии: радуйся, Благословенная Богородице, упование душ наших.

Господи, помилуй (трижды). Слава, и ныне:

Кондак, глас 6-й

Подвиги во страдальчестве, подвиги в вере положила еси тепле за Христа Жениха твоего. Но и ныне, якоже ереси, и врагов шатание под ноги воинству нашему покорити моли Богородицею, яже от шестисот тридесяти Богоносных отец предел приемшая, и хранящая, всехвальная.

Икос

Что твои́х страда́ний, или́ что исправле́ний, или́ что твоего́ де́вства, или жити́я непоро́чнаго твоего́? Ты бо возвесели́ла еси́ Отца́, я́ко Сы́ну уневе́стившия, и Ду́ху Свято́му себе украси́вши. Кто довлéет к сим? Кто глаго́лати ны́не возмо́жет, коли́ки ты осиява́ют добродéтели незаходи́мы? Я́ко от восто́ка бо грóбу возсия́вшу, всем сия́еши, и лучи́ пу́щяеши на земли́ и в мо́ри, и во всю подсо́лнечную, освеща́еши и благоуха́еши концы́. Те́мже и сви́ток, ввэ́ренный от шестисот и три́десятих богоно́сных оте́ц преде́л прие́мши, сохрани́ла еси́, всехва́льная.

Песнь 7

Ирмос: Пла́мень пе́щный порабо́тиша благочестивии о́троцы, тем свы́ше ороси́ я, гото́вы пали́мы по естеству́, но па́че естества́ му́жески поя́ху: благослове́н еси, Го́споди, на Престо́ле Сла́вы Ца́рствия Твоего́.

Свята́я равноапо́стольная вели́кая княги́не Ольго, моли́ Бо́га о нас.

Подóбно Иудифи сотвори́ла еси́, посреде́ куми́рских тели́щ вше́дши, тех нача́льника сокруши́ла еси́, и демоноче́тцы посрами́ла еси́, вся же лю́ди научи́ла еси́ в чистоте́ вопи́ти Христу́: благослове́н еси́, Го́споди, на Престо́ле Сла́вы Ца́рствия Твоего́.

Свята́я равноапо́стольная вели́кая княги́не Ольго, моли́ Бо́га о нас.

Похва́льными цветы́, а́ки ца́рский вене́ц Богому́дрой твоёй главе́, в па́мять твою́ прино́сим: ю́же Христо́с нетле́нием вéнча, Ольго досточу́дная, моли́ся за твоё ста́до, изба́виться от вся́каго зла, вопию́щим: благослове́н еси́, Го́споди, на Престо́ле Сла́вы Ца́рствия Твоего́. *Слава:* Лива́нскую ли го́ру нарече́м тя? На тя бо роса́ Небе́сная сни́де. Или́ Фисо́н реку́, добре́йший сапфи́р ка́мень честный, Влади́мира иму́щую, имже просвети́ся Росси́йская земля́? Но моли́теся за ны взыва́юще: благослове́н еси́, Го́споди, на Престо́ле Сла́вы Ца́рствия Твоего́.

И ныне: Киво́т позлаще́н Тя Ду́хом имену́ем, спа́сшую мир от пото́па разу́мнаго, Де́во, спаси́ нас. На Тя бо наде́емся и к Тебе́ прибега́ем. Отча́янные в пучи́не от грех и напа́стей изба́ви вопию́щия: благослове́н еси́, Го́споди на Престо́ле Сла́вы

Царствия Твоего.

Песнь 8

Ирмос: Крепцыи отроцы трие суще, силою оболкшеса Святыя Троицы, уловиша и победиша халдеи, и дивно изменися естество: како огонь в росу прелажашеся? Без туги я сохрани яко пленами, о проливый мудрость на всех делех Твоих, Боже, Тя превозносим во веки.

Святая равноапостольная великая княгине Ольго, моли Бога о нас.

Крепка яко львица, силою Святаго Духа оболчена, едина устремися всюду истерзати кумиры, и дивно на небеси и на земли: како жена прежде Бога познавает, еуже исперва всему роду падение бысть, тою же ныне спасени поем: о проливый мудрость на всех делех Твоих, Боже, Тя превозносим во веки.

Святая равноапостольная великая княгине Ольго, моли Бога о нас.

Премудрость Божия прежде о тебе написала есть: се еси добрая Моя и прекрасная, и порока несть в тебе. Блеск лица твоего яко мира обоняние, назнаменоваше твое, Ольго, крещение: еже посреде кумирския лести на тебе обоня Христос, и всех нас от смрада демонскаго к покаянию милостию Своею привел есть.

Слава: Помяни мене, госпоже Ольго, убогаго твоего раба, окраденнаго от врага, и согрешившаго паче человек: и помолися Христу, подати ми прощение о всех согрешениях, яже нечувственно содеях окаянный, да покаянием вопию: о проливый мудрость на всех делех Твоих, Боже, Тя превозносим во веки.

И ныне: Не презри, Дево, Твоих раб мольбы, о Тебе бо хвалимся, Твое малое стадо мы есмы: потщися в заступление наше, и изми ны от враг наших, ущедри знающия Тя Матерь Божию, и Сыну Твоему вопиющия: о проливый мудрость на всех делех Твоих, Боже, Тя превозносим во веки.

Песнь 9

Ирмос: Из Едема изиде род наш прабабы ради Евы, призван же Тобою, рождшею нам новаго Адама — Христа, во двою естеству, Дево Чистая. Взыгрися Адам прадед, яко избыв первыя клятвы, мы же Тобою хвалящися, яко Тебе ради Бога познахом,

и Тебѣ величаѣм.

Святая равноапостольная великая княгине Ольго, моли Бога о нас.

Веселися Ево прародительнице, иже бо ты прельстив из Едема изведе, ныне же попран есть твоим исчадием. Се бо Ольга Животное Древо Крест Христов в России водрузи, имже всем верным рай отверзся: мы же хвалящися, яко тоя ради Бога познахом, со Владимиром сию величаем.

Святая равноапостольная великая княгине Ольго, моли Бога о нас.

Жену по естеству нарицаем ты, но паче силы женския подвиглася еси. Тмы твоего злата истощила еси, да Христов закон и Учителя приобретаеши, имже просветила еси землю Российскую: мы же тобою хвалящися, яко тебе ради Бога познахом, с мученики ты величаем.

Слава: Закона наставнице чистая, и учительнице веры Христовы, прими похвалу от раб недостойных, и молитву о нас сотвори к Богу, честно творящих твою память: да от напастей, и бед, и печалей, и лютых грехов свободимся: еще же и мук ждущих нас избави, молимся ти, тебе непрестанно величающим.

И ныне: Се Церковь, се Дверь, се Божия Гора Святая, се Жезл, и Сосуд злат, се Источник печатан, се Рай Святой новаго Адама, се Престол страшный, се Мати Божия Пречистая, Заступница всех нас, поющих Ю.